



ATASSUT

UPA 2016/20

Siverth K. Heilmann

12.04.2016

Uunga siunnersuut: Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaat nr. xx, xx. xxx 2016-imeersoq

(Aningaasaqarnermut Aatsitassanullu Naalakkersuisoq)

ATASSUT-mit nuannaarutigalugu Naalakkersuisut missingersuutinut naatsorsuutinullu inatsisissatut siunnersuut saqqummiussimasaat qimerloorparput, ukiunimi arlalinngortuni Inatsisartut aningaasaqarnermut ataatsimiitsitaliaannit kissaataasimavoq, aammalumi pisortat allaffissornikkut susassaqaarfiini allaniit kissaatigineqarsimalluni.

ATASSUT-mit siunnersuutitut saqqummiunneqartoq iluarisimaarilluinnarparput, tassuunakkummi neriuut pilersinneqarmat pisortat iluanni aningaasaqarnermik aqutsinerup pitsanngoriartinneqarsinnaanera, piffissami kingullermi aaqqissuusseqqinnerup kingunerisaanik kommunit pisortat aningaasaqarneranut tunngasuni initusileraluttuinnarsimanerat eqqaassagaanni aammalu inatsisissatut siunnersuut Namminersorlutik Oqartussanuinnaq samminani aamma Kommunit aqunneqarnerat pillugu Inatsisartut inatsisaanni kommunit aningaasaqarnikkut aqunneqarnerat pillugu aalajangersakkat ilai taarserneqassammata.

Nunatta aammalumi kommunit ataasiakkaat aningaasaqarnikkut inissisimanerat isiginiassagaanni, siusinnerusukkullu aamma aningaasaqarnikkut sippuilluni imaluunniit missingersuusiornermut inatsimmi aalajangersakkanik unioqqutitsilluni imaluunniit kommunit aningaasaqarnikkut aqunneqarnerat pillugu aalajangersakkanik unioqqutitsisarsimanerit eqqaaginnassagaanni, taava ATASSUT-mit naammagisimaarluarparput inatsisissatut siunnersuutip malitsigissamagit kommunit aamma Namminersorlutik Oqartussat pisinnaatitaaffiisa sukateriffigineqarnissai. ATASSUT-mulli pingaaruteqarpoq qulakkeerniassallugu inatsisiliornermi oqimaaqatigiissaarinissaq, siunnertarineqanngitsumimmi kommunit namminneq oqartussaassuseqarnerannik killilersuutaasinnaasunik pisoqannginnissaa qulakkeerniarlugu.

ATASSUT-mit aamma nuannaarutigaarput, Naalakkersuisut matumani siunnersuuteqarnermikkut isiginiarmassuk namminersorlutik inuutissarsiutillit ineriartortinneqarnissaat, taamaakkaluartorli ATASSUT-mit paaserusunnartipparput Naalakkersuisut aaqqissuusseqqinnernik aningaasartuutitut annikillisaasinnaasutut aamma aaqqissuusseqqinnerni aningaasalersuinerit suusinnaasutut takorloornerai?

Naalakkersuisut inatsisissatut siunnersuummut saqqummiussissummini ilaatigut nammineq tikippai sanaartornerup iluani iluarsaassinissamut kinguaattoorutit. Taamaattumik ATASSUT-mit pisariaqarsoraarput tikkuassallugu iluarsaassinissamut kinguaattoorutit annertusiartunnginnissaasa nakkutigilluinnarneqarnissai, soorlu aamma immaqa ilanngullugu inatsisissatut siunnersuutip suliarineqarnerani misissorneqarsinnaasoq sanaartornissamut missingersuutit aalingersimasumik annertussusaasa aserfallatsaalisaanissamut immaqa immikkoortinneqartarsinnaaneri, taamaasiornikkut siunissami iluarsaassinissanut kinguaattoorutit annertusingaluttuinnannginnissai pinaveersimatinniarlugit.

Ilanngullugu aamma ATASSUT-mit maluginiarsimavarput, inatsisissatut siunnersuutip § 18-atigut Piffissaq ungasinnerusoq eqqarsaatigalugu aningaasaliinissamut Aningaasaateqarfik pilersinneqassasoq siunnersuutigineqarmat, ataatsimullu isigissagaanni aningaasaateqarfiup siunertarivaa nunatta karsiata immikkut ittumik isertitarisaasa ilaasa piffissamut ungasinnerusumut aningaasaateqarnissaq tunngavissaqartinniarlugu aningaasaliissuteqartarnissaq, tassaasinnaappullu ilinniarfiit illuutaannik sanaartornermut, attaveqaatinut imaluunniit suliniutinut allanut pisortat aningaasaqarnerannik attanneqarsinnaasumik ineriartortitsisunut, tamannalu ATASSUT-mit tunngaviusumik assortorsinnaangilarput, kisiannili aamma ATASSUT-mit isumaqarpugut pisariaqartoq aningaasaateqarfiup erseqqarinnerusumik aaliangersaaffigineqarnerani qulakkeerniarneqassasoq aamma ”aningaasat kaavijaartinneqarlutik sulisinneqarnissaat”.

ATASSUT-mit siunnersuutitut saqqummiussaqaq ataatsimut isiginiassagutsigut iluarisimaaqaarput, isumaqarpugulli inatsit taama pingaaruteqartigisoq sukumiisumik suliarineqartariaqartoq, taamaattumik aamma sukumiisumik suliarineqarnissaa qulakkeerniarlugu ATASSUT-mit kaammattuutigissavarput siunnersuutip Inatsisartut ataatsimiitsitaliaanni suliarineqalerpat sapinngisamik Inatsisartuni partiit tamarmik peqataatinneqarnissaat qulakkeerniarneqassasoq.

ATASSUT-mit akornutissaqarsorinngilarput inatsisissatut siunnersuutip Inatsisartut ukioq manna ukiakkut ataatsimiinnerani aatsaat aappassaaneerneqassappat, isumaqarattami pingaaruteqartoq siunnersuutip suliarilluarneqarnissaa, aammalu missingersuusiornermut inatsisip nutarsarneqarnissaa aamma Kommunit aqunneqarnerat pillugu Inatsisartut inatsisaata kommunit aningaasaqarnikkut aqutsinera pillugu aaliangersakkat sivisoqisumik utaqqisimasamut, tusarniarneqartussat sapinngisamik amerlanerpaat qisuariaateqarsinnaanissaanut periarfissikkumallugit.

Taamatut ATASSUT-mit oqaaseqaateqarluta Naalakkersuisut qutsavigissavagut inatsisissatut siunnersuummik saqqummiussinerannut kissaatigissallugulu Inatsisartuni pitsaasumik siunertaqarluartumillu oqallinneq ingerlanneqarumaartoq, taamaasilluta siunnersuut Inatsisartut ataatsimiitsitaliaannut susassaqartunut suliarineqarluni ingerlateqqinneqarnissaannut innersuussutigissavarput.

Qujanaq!